

तुबारि संपादकीय
टीम

◆अस इ उम्मिद करुं लगे से कि एण बाड़े दिन अन्तर सुआ मेहणु इस कम अन्तर सहयोग कते।

◆इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगि घाटि अन्तर पहुँ जे इ पत्रिका शुरु कियो असी।

◆तुबारि एक अवाणिज्यिक पत्रिका भो।

◆तुबारि पत्रिका कोड मेहणु, जनजाति, त संस्कृति गल्लि कट्टेण जे नेई छपाण लगे। अगर कोड ई सोचता बि त अस जिम्मेवार नेई।

◆छपाणे पेहले सोभ आर्टिकल दुई टाई पांगेई मेहणु हरालो असे। इ त खुलि बोक असी कि पेहिल बार पांगवाड़ी लिखणे सुआ मुशकिल भुन्ति त गलति बि भुन्ति। अगर कोड लिखणे गलति असी त असी जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल ना मिल्ल, या घाटि मेहणु के मदद ना मिल्ल त तुबारि पत्रिका कदि बि बंद भुई सकति।

◆कोड चिज छपां सि या नेई छपां जे तुबारि संपादकीय टीमे पुरा अधिकार असा।

◆अस किलाड़ केन्द्रीय पुस्तकालय, त बजार राखे ठेके भैड हरिरामे दुकान अन्तर तुबारि ड्राप बाँस पठ बि अपुं सझाव ओर आर्टिकलस रखुं जे सुविधा कियो असी।

◆अस सोभि पांगि मेहणु जे हात जोड़ कई निवेदन कते कि, तुस बि कोड अछा आर्टिकल, पुराणि या नौई कथा, कहावत, कविता, त नौवे घीत (पांगवाड़ी अन्तर) लिख कइ छपां जे हेंनदे दिए।

तुबारि संपादकीय टीम

9418431531
9418429574
9418329200
9418411199
9418411599



पंगवाड़ी वेबसाइट - सुहलियते एक खास छेड़ www.pangi.in


जपल केआं खड़ इन्टरनेते

शुरुवात भुओ असि, होरे होरे जानकारी मेणे सुकतु भोई गो असी। इन्टरनेट एचेल दुनिया अन्तर सोबि केआं मोटा लाईब्रेरी असा। एसे मेहणु अपु कम्प्युटर बोलि या मोबाईल बोलि हेर सकते। पूरी धरती मेहणु बिच 70 प्रतिशत मेहणु इन्टरनेट बरताण लगे असे। त केसे बारे इन्टरनेट अन्तर भुण अबल बोक असी।

खुश खबरी इ: असु की पांगी घाटी त पंगवाली भाषा बारे एचेल एक वेबसाइट बणो असी जेसे लिंक www.pangi.in

असी। पांगेई संस्कृती त पांगेई बोली बारे सुसुर जानकारी देण त जे स्थानीय प्रतिभा असी तेन्हि सुआ मेहणु के अगिर अपु अपु प्रतिभा होरालण जे मौका देण एस वेबसाइट लक्ष असा। एस वेबसाइट अन्तर पूरी धरती मेहणु जे पांगेई लेख, घीत, फोटोज, विडियोज त होरे खास मज्जेदार जानकारी मेती।

इ: वेबसाइट बणो इ: असा कि जेठ जेठ बि इन्टरनेते सिगनाल कमजोर असा तेठि बि ए: सुसुर चल सकता। ए वेबसाइट अंग्रेजी, हिन्दी त पंगवाड़ी भाषा अन्तर बणो असा त एसे कोई बि मेहणु ब्रौज कइ सकता। वेबसाइट खोलुणे टेम सोब कुछ पंगवाड़ी भाषा अन्तर भुन्ता। पर अगर हिन्दी या अंग्रेजी अन्तर ब्रौज करुण असा त पुठे दुतो भाषा टाब पुठ चिक कइ भाषा बदल सकते। पड्डे तुसी पांगी घाटी बारे त पांगेई भाषा, घीत, फोटोज, विडियोज त संस्कृती बारे खास जानकारी मेती। पांगी घाटी अन्तर भुण बाड़ा घटना त होरे सुहलियते काम बारे बि इठ जानकारी मेती। जीं पांगी स्कीं असोसिएसन सुराल अन्तर भुओ स्कीं प्रतियोगिता फोटोज बि वेबसाइट पुठ रोख असा। अगर कोई पांगेई मेहणु अपु लेख, कथा, घीत, फोटोज, विडियोज, या होरे जानकारी मेहणु के अगिर रखुण चहन्ते त से तस इस वेबसाइट पुठ कइ सकते। इस वेबसाइट पुठ कुछ अपलोड करुं जे info@pangi.in पुठ ईमेल लंघाए या श्री.माहतम चंद, किलाड़ केन्द्रीय पुस्तकालय, जुए संपर्क करे।



इस वेबसाइट बोलि धरती केसे कुणे केआं बि मेहणु पांगी घाटी जुए जुड़ सकता। से अपु गी बिश कइ बि इठिआ खबर नी सकता त इठ भुणे बाड़े होर त्योहार त मेले त होरे घटना बारे पता लाई सकता। एस वेबसाइट बोलि एणेबाड़े रोजी अन्तर इठ पर्यटन बी बढ़ सकतु त मेहणु के बुछ पंगवाड़ी भाषा बारे जागरुकता एन्ती। लोकाल मेहणु जे अपु अपु गी, ग्रां केआं दूर बिशते तेन्हि बि ए: वेबसाइट अराम देन्ती।

लखु नोउए यक स्याणा मेहणु रोज ब्यादि दुई केनुड पुओण नेन्तथा। दुई केनुड बुच्छ यक केनुड बोडु अब्बुल थियु। तेस अन्तर पुरा पुओण गी पुजी घेन्तुथा। पर होरे केनुड छिछड़ी गोओ थियु से गी पुजते-पुजते आधु खालि घेन्तिथा। लखु हर रोज यक पुरा केनुड त यक आधु केनुड पुओण गी पुजान्ताथा। इः भुन्ते-भुन्ते सुआ टाइम भोइ गा, से केनुड जे अब्बुल थी से रोभ किडताथ कि से हर रोज पुरा केनुड पुओण पुजाई सकती। पर होरु जे केनुड छुछुडु थी तस सुआ दुख भुन्ताथा। मे छुछुडु भूणे बझाई जोए लखु रोज आदु पुओण नेन्ताथा। पता यक रोज तस ति दुख भुआ त तनी लखु जे बोलु, मोउ माफ करे मे कमजोरी बझई जुए तुस रोज घट पुओण आणते। त लखु तस केया पुछ्छ 'तोउ किस दुख भो असा? से बोता "मे पुठ छिछड़ी भोई गो असी त मेई रोज अपु हिसाव जुए पांगी डील नेई बटो, अउ सिर्फ आधु ई केनुड पुओण पुजाई सकती। 'त लखु बोता जपल अस गी जे धेन्ते तपल बत्ती भेडी बाई फीयूड हेरिण दे। जपल से गी जे वापीस आ, तपल तनी बत्ते किनार बाई अबुल अबुल फियूड हेरे, पर तस अपु कमजोरी बोलिये जादा दुख भुआ, इ हेर कइ लखु तस जे बोलु तेई बत्ते किनार बाई फियूड जरूर काओ भोल, से सिर्फ, तस किनार बाई थिए जेस किनार बाई तु भुनतीथा। जे पुओण ते बेलि झडतूथ तसे बेलि सवा फियूड बूटे लुगो असे, त से बोडी कई तहनी बुटी पुट अबल-अबल फियूड लगो असे। पर जेस किनार होरु केनुड भुनतुथ, तस किनार घास बी नेई लुंगो। मोउ तें कमजोरी पता थिआ पर मेई से कमजोरी यक खरे कम जुए बताणि की। अगर तू छिछड़ी ना भुन्तीथ, आज ई अब्बुल- अब्बुल पियुडु बथ किनार ना भुनन्तेथ त थको मेहणु खुश न भुन्ताथा। इ सुण कइ छिछुडु केनुड समझिती कि "हें बुछ कोई कमजोरी असी, से कुछ खरी बजाई जुए असी"। जे असी चलान्ता तस सोब पता असा कि मे कमजोरी बोली केसे भलाई भुन्ती त की फायदा भुन्ता। अस सोब कमजोर असे त असी सिर्फ अपु कम करु लौतु ना कि केसे होरी जुए लहुं असु। शम्मा सिंह

कुछ खास खबर

- ♦ जून महीने अन्तर पांगेई सुआ मेघें लगी जसे कारण सुराल, फणपार, रेई, शुशार बदे फटे, पर जानी त माली कोई नुक्सान न भूआ पर जिमी नक्सान भूआ।
- ♦ पांगेई एस:डी:एम पागेई व्यापारी जे सब्जी त चिकने भाव कम करणे बोलो असू।
- ♦ पागेई साच पास जोत बी खुलीग ओसू, अब पागेई मेहणु चाम्ह एण-घेण जे सुक्तु भोई गो ओसु।

राजु बोउ तेस केआं पुछ्छ.....

राजु! इस हपता तू कि बड़िया कम किओ थिअ, मोजे बोल?

हि ब्यादि यक मेहणु पुर्थि बस टाण जे दौडा, पर बस छुट गई। तउं जट-पट तसे पतू मेइ अपु कुत्तर शेरु छड दुतौ असा, से बन्दा डर कई तेज दौडा त बस मेय गई।



ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please ☎ 9418429574

Physical Medicine Rehabilitation Clinic

DR. ROSY DHANUNJAY. Moth

पेंगेई मेहणु जे खुशखबरी असि कि, पी० एम० आर० क्लीनिक (PMR Clinic) किलाइ पोस्ट ओफिसे भेइ असा।

Specialized in Neurosciences

☎ 9418411599

रीडे हड्डी चोट, जिस्म सुन भुणे बिमारी, मोडु चिंग, जियेंणु चिंग, टुटो हड्डी, अपंग त होरि बिमारी के हस्पताइ रिफ्रेन्स बोलि मरीजे ईलाज इठि भून्ता।

Cerebral palsy, Paralysis, Spinal cord injury, Spondylosis, Physiotherapy and Physical disability counselling etc treatment is available here. TIMINGS:- MONDAY TO FRIDAY 10.00AM TO 01.00.PM.